

甲午 上御思政殿講試專經文臣入格者行賞有差○遣御史李無疆于平安道宋賛于全羅道金鎰于清洪道閔荃于慶尚道仍傳曰與監司同議救荒無疆則無宣慰使可也○兩司啓兩宗等事不允○夜良方如火氣

乙未 上御朝夕講○兩司啓兩宗等事不允○日暈色內黃外白夜月微暈

丙申兩司啓兩宗等事不允○賜實錄修纂官等宴

丁酉 上御朝講特進官安珰曰頃因災變有措置軍務之教故臣見謄錄庚午倭亂之時都元帥軍官之數三百而諸將不足故未能充數諸將軍卒之不足非今斯今在古亦然今者人無恒心不重鄉土日以逃躲身雖不逃率皆無馬侍衛習陣等時皆給價買騎猝有緩急將焉用之人有衣食然後保其身而為國家之役今者庶民艱食救死不瞻軍務馬政何從而理焉古者勸農之時民於早秋採菜冬則食菜而農月食穀故民不至飢餓而歲亦大熟今則人無遠慮但知食穀不知食菜今若